

*Atukuzwe Mungu, Baba wa Bwana wetu Yesu Kristo, aliyetubariki kwa baraka zote za roho, katika ulimwengu wa robo, ndani yake Kristo—Waefeso 1:3.*

“Mungu, kwa kuwa ni mwingi wa rehema, kwa mapenzi yake makuu aliyotupenda; hata wakati ule tulipokuwa wafu kwa sababu ya makosa yetu; alituhisha pamoja na Kristo; ... Akatufufua pamoja Naye, akatuketisha pamoja Naye katika ulimwengu wa roho, katika Kristo Yesu; ili katika zamani zinazokuja audhahirishe wingi wa neema Yake upitao kiasi kwa wema wake kwetu sisi katika Kristo Yesu.”

**H**ayo ndiyo maneno ambayo “Paulo mzee,” “mfungwa wa Kristo Yesu,” aliyaandika kutoka katika makazi yake gerezani huko Rumi, alijitahidi kuwawekea mbele ya ndugu zake yale ambayo aliona kuwa lugha haitoshi kueleza katika ukamilifu wake—“utajiri wake Kristo usiopimika,” hazina ya neema imetolewa bure kwa wana wa wanadamu walioanguka. Mpango wa ukombozi uliwekwa kwa kafara, zawadi. Mtume nasema : “Mmejua neema ya Bwana wetu Yesu Kristo, jinsi alivyokuwa maskini kwa ajili yenu, ingawa alikuwa tajiri, ili kwamba ninyi mpate kuwa matajiri kwa umaskini wake” .... Na kama Baraka ya mwisho ya ukombozi, “*karama ya Mungu* ni uzima wa milele katika Kristo Yesu Bwana wetu” .... Hakika hakuna hata mmoja ambaye, akiutazama wingi wa neema, anaweza kujizuia kusema pamoja na mtume: “Mungu ashukuriwe kwa sababu ya kipawa Chake, tusichoweza kukisifu kama ipasavyo.”

Jinsi mpango wa ukombozi unavyoanza na kuishia na zawadi, ndivyo upaswavyo kuendelezwa mbele. Roho ile ile ya kujitoa kafara iliyonunua wokovu kwa ajili yetu itakaa katika mioyo ya wale ambao watakuwa washirika wa zawadi ya mbinguni. Mtume Petro anasema: “kila mmoja kwa kadiri alivyoipokea karama, itumieni kwa kuhudumiana; kama mawakili wema wa neema mbalimbali za Mungu.” Yesu aliwaambia wanafunzi Wake Alipowatuma kwenda: “mmepata bure, toeni bure.” Ndani ya mtu ambaye amejazwa kikamilifu na huruma ya Kristo hawezi kuwa na chochote cha ubinafsi au kujiona kuwa bora.

Yeye anywaye maji ya uzima ataona kwamba “yatakuwa ndani yake chemchemi ya maji, yakibubujikia uzima wa milele.” Roho wa Yesu ndani yake ni kama chemchemi ibubujikayo jangwani, ikitiririka ili kuwaburudisha wote, na kuwafanya wale wanaokaribia kuangamia kuwa na shauku ya kunywa maji ya uzima. Ilikuwa ni roho ile ile ya upendo na ya kujikana nafsi iliyokaa ndani ya Yesu ambayo ilimhimiza mtume Paulo kufanya kazi zake nyingi. Anasema “Nawiwa na Wayunani na wasio Wayunani, nawiwa na wenye hekima na wasio na hekima” (Warumi 1:14). “Mimi, niliye mdogo kuliko yeye aliye mdogo wa watakatifu wote, nalipewa neema hii ya kuwahubiri Mataifa utajiri wake Kristo usiopimika” (*Waefeso 3:8*)

(Testimonies for the Church 5:730, 731).